

("Službeni glasnik BiH", broj: 46/19)

Na osnovu člana 205. Zakona o osnovama sigurnosti prometa na cestama u Bosni i Hercegovini ("Službeni glasnik BiH", br. 6/06, 75/06, 44/07, 84/09, 48/10, 18/13, 8/17, 89/17, 9/18), zamjenik ministra komunikacija prometa Bosne i Hercegovine donosi

NAREDBU

O HOMOLOGACIJI PNEUMATIKA U POGLEDU EMISIJE BUKE PRI KOTRLJANJU I/ILI PRIJANJANJA NA MOKRIM POVRŠINAMA I/ILI OTPORA KOTRLJANJU

I - PODRUČJE PRIMJENE

Član 1.

Novi pneumatici klasa C1, C2 i C3 ("C1", "C2" i "C3") u pogledu emisije buke i/ili otpora kotrljanju i/ili prijanjanja na mokrim površinama moraju biti homologizirani u skladu sa ovom naredbom.

Ova naredba se ne odnosi na:

- pneumatike konstruirane za privremenu upotrebu (rezervni pneumatici) i označene sa "Temporary use only";
- pneumatike sa oznakom nazivnog prečnika naplatka manjom ili jednakom "10" (254 mm), ili većom ili jednakom "25" (635 mm);
- pneumatike konstruirane za takmičenja;
- pneumatike namijenjene za ugradnju na cestovna vozila kategorija različitih od M, N i O;
- pneumatike opremljene dodatnim uređajima u svrhu unapređenja njihovih vučnih osobina;
- pneumatike sa brzinskom oznakom manjom od 80 km/h (oznaka "F");
- pneumatike konstruirane isključivo za ugradnju na vozila prvi put registrirana prije 1. oktobra 1990. godine;
- profesionalne terenske pneumatike (pneumatici namijenjeni prvenstveno za upotrebu u teškim terenskim uvjetima).

U smislu ove naredbe:

- pneumatici klase C1 ("C1") su pneumatici konstruirani prvenstveno, ali ne isključivo, za vozila kategorije M₁, N₁, O₁ i O₂ i homologizirani u skladu sa Naredbom o homologaciji pneumatika za motorna vozila i njihove prikolice (UNECE pravilnik br. 30);

- pneumatici klase C2 ("C2") su pneumatici koji su konstruirani prvenstveno, ali ne isključivo, za vozila kategorija M₂, M₃, N, O₃ i O₄ i homologizirani u skladu sa Naredbom o homologaciji pneumatika za privredna vozila i njihove prikolice (UNECE pravilnik br. 54) i označeni oznakom opterećenja za pojedinačnu ugradnju manjom i jednakom "121" i brzinskom oznakom većom ili jednakom "N";
- pneumatici klase C3 ("C3") su pneumatici koji su konstruirani prvenstveno, ali ne isključivo, za vozila kategorija M₂, M₃, N, O₃ i O₄ i homologizirani u skladu sa Naredbom o homologaciji pneumatika za privredna vozila i njihove prikolice (UNECE pravilnik br. 54) i označeni:
- oznakom opterećenja za pojedinačnu ugradnju većom ili jednakom "122"; ili
- oznakom opterećenja za pojedinačnu ugradnju manjom i jednakom "121" i brzinskom oznakom manjom ili jednakom "M".

II - ZAHTJEVI

Član 2.

Jednoobrazni uvjeti za pneumatike iz člana 1. ove naredbe koji podliježu ispitivanju, metode ispitivanja, način vršenja kontrole saobraznosti serijske proizvodnje sa homologiziranim tipom, postupak i način uzimanja uzoraka serijske proizvodnje, sadržaj izvještaja o ispitivanju radi izdavanja saopćenja o homologaciji, izgled homologacijske oznake i obrazac saopćenja o homologaciji dati su u Jednoobraznim propisima koji se odnose na homologaciju pneumatika u pogledu emisije buke pri kotrljanju i/ili prianjanja na mokrim površinama i/ili otpora kotrljanju (Pravilnik broj 117 Ekonomske komisije za Evropu Organizacije ujedinjenih naroda, u daljnjem tekstu: UNECE pravilnik br. 117), sa važećim izmjenama i dopunama koje je prihvatila i primjenjuje Bosna i Hercegovina, donesenim na osnovu Sporazuma o usvajanju jednoobraznih tehničkih propisa za vozila sa točkovima, opremu i dijelove koji mogu biti ugrađeni i/ili korišteni na vozilima sa točkovima i uvjetima za uzajamno priznavanje dodijeljenih homologacija na osnovu ovih propisa.

UNECE pravilnik br. 117 u izvornom obliku (na engleskom jeziku) dostupan je u Ministarstvu komunikacija i prometa Bosne i Hercegovine, odnosno kod administrativnog tijela za poslove homologacije vozila i dijelova.

III - HOMOLOGACIJA I ISPITIVANJE

Član 3.

Homologacija pneumatika iz člana 1. ove naredbe vrši se na uzorcima tipa obuhvaćenim ovom naredbom.

Homologacijska ispitivanja pneumatika iz člana 1. ove naredbe može provoditi samo laboratorija koju je ovlastilo Ministarstvo komunikacija i prometa Bosne i Hercegovine.

IV - PROVJERA USKLAĐENOSTI

Član 4.

Provjera usklađenosti vozila i pneumatika sa zahtjevima ove naredbe provodi se prema postupku koji je definiran zakonskim i podzakonskim propisima kojima se uređuje homologacija vozila.

Pri provjeri usklađenosti tipa vozila i pneumatika, novoproduzvedenih i korištenih vozila, prihvatat će se homologacije dodijeljene u skladu sa serijom (serijama) izmjena i dopuna UNECE pravilnika br. 117 prema zakonskim i podzakonskim propisima i međunarodnim ugovorima kojima se uređuje homologacija vozila.

V - PRIMJENA

Član 5.

Ova naredba stupa na snagu osmog dana od dana objavljivanja u "Službenom glasniku BiH".

Broj 02-05-02-2-1707/19
4. juna 2019. godine
Sarajevo

Zamjenik ministra
Saša Dalipagić, s. r.